

南

鴻乙通卷七十八

天地二

易曰日入地中明夷邵子云構精之象後
人遂謂日晝行天夜入地丘長春日三
光輕清既上於天如何却沉於地二十
八宿周天均布太陽逐日會合逐月遷
移且如日在箕斗箕斗在天河日入地
時星河皆入地耶日獨入地而星河只

在天耶天上日月常無出沒人間常有
出沒東方日出時西向千里之外猶昧
萬里之外猶昏北斗斡運昭然可見強
稱入地有何義旨楊用脩曰明夷日入
地中乃假象明理如天在山中之類邵
子構精之說元儒已譏其褻夫矣釋典
言日繞須彌半常行不息南閻浮提日
正中東拂婆提日則始沒西瞿陀尼日
初出北鬱單越正夜半與丘說合

彼太虛空日照則明雲屯則暗風搖則動
霽澄則清氣凝則濁土積成霾水澄成

映宗鏡錄

陰陽二氣陶育羣品精象所寄是爲日月
羣生之性章爲五才五才之靈五星是
也

宋曆志

天體清通其懸鏡以照下土乎有一物則

著一物之象有一事則著一事之象觀
天者可得而指焉因氣求形天道遠乎

哉唐書語

文耀麗乎天其動者有七日者陽精之宗
月者陰精之宗五星五行之宗

管子曰日掌陽月掌陰星掌和陽爲德陰
爲刑和爲事故聖王日觸則脩德月觸
則脩刑慧星見則脩和

四時天之吏也日月天之使也星辰天之
期也虹蜺慧孛天之忌也虎嘯而谷風
至龍舉而景雲屬麒麟闕而日月食鯨
魚死而慧星出螯珥絲而商絃絕青星
隕而渤海決人之情通於天誅暴則多
飄風枉法則多蟲螟令不收則霪雨殺
不辜則國赤地

淮南子

日月星皆精氣麗天體如火光不可搏執

隕而爲石者得地氣故耳又曰陰精之融而未盡者月也陽光之迸而成形者電也日中之烏亦陽精之融而未盡者也

璫壺玉液

舊曆說曰日猶火也月猶水也火則施光水則含影故朏生于向日魄生于背日當日則光盈背日則光滅

日東月西根離坎也離虛坎實抱乾坤也日其坤精之宅耶育乎陽而流光月其乾精之宅耶成乎陰而不同受其光日之稱烏其畢之來耶月之稱兔其房之往耶房離而畢坎其氣化之象耶

膚語

日稱太陽而日有日之星月稱太陰而月有月之星按其氏星經云日一星在房之西氏之東日者陽宗之精也爲雞二足爲烏三足雞在日中而烏之精爲星

以司太陽之行度日生於東故於是在
馬月一星在昴之南畢之北月者陰宗
之精也爲兔四足爲蟾蜍三足兔在月
中而蟾蜍之精爲星以司太陰之行度
月生于西故于是在馬日精氏房月精
昴畢自司其行度而氏房昴畢乃黃道
所經不得而司之按此是日月二政之
外又有日月二星今人言日中有三足
鳥而不言有二足之雞言日中有鳥月
中有蟾蜍而不知鳥與蟾蜍之精爲星
也

日月二政之外又有二星不但日月如雲
雨雷電皆有星故甘氏曰雷公電姥雲
將雨師與夫霹靂斧吏皆北方水府之
精媿訾爲天門故其神棲焉

范育曰日出於卯卯之屬爲兔而兔之宅

乃在月中月出於酉酉之屬爲雞而雞
之宅乃在日中是謂陰陽之精互藏其
宅

黃庭經云高奔日月吾上道鬱儀結璘善
相保注引上清紫文云鬱儀奔日之仙
結璘奔月之仙據此奔月者又不止一
嫦娥矣不知月何事而爲逋逃藪耶又
謂月中有兔有桂有仙人無忌斫月桂
者爲吳剛或爲吳質又有人以七寶粧
月者愈不經矣

登真隱訣曰上真之道七鬱儀奔日文爲
最結璘奔月文爲次蓋鬱儀羲和也結
璘嫦娥也據此則結璘乃嫦娥別名山
海經東南海之外有女子羲和浴日西
北海外有女子嫦娥浴月嫦娥之說山
海經誤之也

月無光映日而有光月體常圓映日有正
側故月光有圓缺趙緣督曰如懸黑漆
丸于簷下映日必有光轉射暗壁其半
映日故有光半元暗也月與日隔而能
受日之光者陰陽精氣之潛通如吸鐵
之石感霜之鐘莫或間之也月明不全
瑩者如懸明鏡照水處則瑩照地處則
暇世以爲山河所印之影是也緣督此
論不可易矣

春秋但言日有食之不言何物月食不書
後人謂月抗日則月食月掩日則日食
星家又謂爲羅計所掩羅計之說無據
抗日之說亦未可信蓋月無光故掩日
則月缺其處是矣月本借日爲光對日
則光滿焉得謂之抗而反見食耶近在
南中訪熟知天文者云非抗也乃與日

對時不全合耳蓋對全則月光滿忽失
其道一分不對則食一分數分不對則
食數分頃之復其當行之道而相對則
復滿矣

頃見太史局官劉孝榮言月無光受日爲
光望夜正與日對故一輪光滿或月行
有遲速先後日先所不照處則爲食朔
旦日月同宮如月在日上掩太陽而過
則日光爲所遮故爲日食非此二日則
無薄食之理按此說主羅睺計都交初
交中之說耳其實自相食日光所不照
處月隨之而缺其理尤信

洪容齋

大戴禮誥志篇孔子曰聖人有國則日月
不食星辰不孛慈湖謂堯舜禹之時歷
年多無日食至太康失邦始日食歷家
謂日月薄食可以術推者衰世之術也

亦不能一一皆中一行歸之君德頗與孔子之言合一行之術精矣而有此論按自古以來日食蓋三變矣二帝之世不食其後人事感召則食尚不可預知後世則食有常期術家皆得推測矣然慈湖說恐亦無據 王伯摩

癸辛雜誌云揚州都統趙馬兒嘗提兵艇

往援李壇於山東舟至登萊殊不可進

滯留凡數月嘗于舟中見日初出海門時有一人通身皆赤眼色純碧頭頂大日輪而上日漸高人漸小凡數月所見皆然按此蓋因羲和御日之說爲之附會亦以自解其逗遛不進之耻不足信也

十日並出有之乎漢書有如日夜出晉紀日夜出宋初兩日相盪於東南例而觀

之十日其有之何也陽精之亂不相攝也占書有數日相掩數日亂闔之占可謂之無乎仰射十日則吾不信矣

膚語

日射陽燧而火生太陽之精氣至烈也以射雲際而行陰雨之不涸語曰虹能止

雨信矣

膚語

邵子曰日食月以精月食日以形是以君

子用智小人用力此見君臣之理也山

川之氣積為列星光芒輝煥精之盛也

精神耗竭於是其有隕星星隕精氣竭也

川竭水脈絕也山崩地脈絕也當其所

主之地則為災海水不潮亦水脈絕也

草木子

月光生於日之所照魄生於日之所蔽此

張衡靈憲之說也戊戌九月晨起見月

西墜闕處向東南此時日在寅宮矣廿

卷七十八
二日晨起見月闕正向西周髀步日自
東南而西而北窮天所論日繞辰極沒
西而還東不出入地中于理爲勝谿山
餘話

人君日月同明四時合信故父天母地兄

日姊月

春秋感精符

帝堯時五星自天而實土星之精墜於穀

城山其精化爲圮橋老人以兵書授張

子房云讀此當爲帝者師後求我於穀

城山下黃石是也歲星之精墜於荆山

化爲玉側視之色碧正視之色白下和

得之獻楚入趙獻秦始皇一統天下爲

受命璽李斯小篆其文歷代爲傳國寶

古人異說云是大角星精大角亦木星

也火星之精墜於南海爲大珠徑尺餘

時出海上光照數百里紅氣亘天今名

其地爲珠池亦名珠崖金星之精墜于
終南圭峰之西爲太白山精化白石狀
如美玉時有紫氣覆之天寶中詔塑玄
元像於長安大寧里臨菑舊邸夢神人
曰太白北谷中有玉石可取而琢之紫
氣見處是也果于其下得玉石琢爲像
於玄元廟水星之精墜於張掖柳谷中
化爲黑石廣丈餘漢末漸有文彩魏青
龍中忽如雷震聲聞百里其石自立白
色爲文有牛馬仙人之狀及玉環玉玦
兼文字應司馬氏爲晉以符金德焉堯
時天氣窮於太陽地氣極於太陰陽九
百六交周之運甲甲洪災之會故五星
實精日月濁景有此異焉

錄異記

太微太一之庭也紫宮太一之居也軒轅
帝妃之舍也咸池水魚之囿也天阿羣

神之闕也四宮者司賞罰太微主朱鳥
紫宮執斗而左旋日行一度以周天日
冬至峻狼之山夏至牛首之山反覆三
百六十五度四分度之一而成一歲

淮

南子

文選任彥昇曰不改參辰九星仰止注引
書周公告成王曰日月星辰四時歲是

謂九星

困學紀聞

雲漢自坤抵良爲地紀北斗自乾携巽爲
天綱其分野與帝車相直皆五帝墟也

嚴遵仙槎唐置之於麟德殿長五十餘尺
聲如銅鐵堅而不蠹李德裕截細枝尺
餘刻爲道像徃徃飛去復來廣明以後
失之槎亦飛去

洞天集

元豐末有人携支機石投進者廣可二尺

許不圓微峩而碧色天漢左界北斗經
其上南墅閑居錄

北斗之側有大理紫微之垣又有大理天
其慎刑獄耶一司空也奎軫兩見一將
軍也婁氏兩見一天田也角牛兩見民
力民命民食固天所重乎紫微之有天
楛也太微之有郎將也天市之有車肆
也一也天之備不虞也周哉膚語

旄頭列畢胃之間天其不外胡夷耶而胃
主捕殺畢主兵刑婁主兵卒觜主兵車
奎爲武庫邊兵參爲邊域兵戈天之防
胡也備矣七宿一夷而六防膚語

玄枵娵訾之名其起中古乎堯之授時無
有也後之雙女磨蝎愈下矣膚語

析木天津之起乎由箕尾而井鬼橫亘紫
微之傍有川流之象焉實沈豈其尾間

耶傳說王良造父因人以命姓耶因星
以命人耶蒙莊其石互襲而爲之耶

膚語

示星所在是曰福星好生之德固鍾於木乎

歲歷一舍天之仁亦有所靳耶

膚語

人事不脩謫見於天或歲星食月或熒惑
紀南斗或太白經天晝見甚者歲星之
精變爲欃槍熒惑之精變爲蚩尤旗墳
星之精變爲天賊太白之精變爲天狗
辰星之精變爲枉矢故爲政者不可不
謹也

或曰分野獨擅於中華星次不霑於荒裔
豈日月私照與李淳風曰華夏爲四交
之中當二儀之正四夷炎涼氣偏鳥語
獸心豈得同日而語故越裳重譯匈奴
稽顙肅慎獻矢西戎聽律四夷宗中國

卷七
之驗也聖人觀象分配國野或取水土
所生或視風氣所宜昴爲旄頭被髮之
象青丘蠻夷文身之國梗河胡騎負戈
之俗胡人事天以昴星爲主越人伺察
以斗牛辨祥秦人占狼弧齊觀危虛各
是其國所宗聖人因性情所感而分屬
之乙巳占

鄭樵通志略云按天之所覆者廣華夏所

占者牛女下十二國耳牛女在東南故
釋氏謂南瞻部洲二十八宿所管者多
十二國之分野隨其所隸耳文獻通考
云牛女雖屬揚州所謂十二國者不特
揚州而已揚州雖可言東南牛女在天
則北方宿也與南瞻部洲之說異矣且
北斗七星自張至于角星書以爲一主
秦二主楚三主梁四主吳五主趙六主

燕七主齊五車五星次舍在畢星書以
爲西北一星主秦東北一星主趙燕東
南一星主魯衛中央一星主楚東南一
星主魏然則北斗五車所主者亦屬十
二國二星初未嘗屬牛女也謂牛女專
主華夏可乎癸辛雜志云世以二十八
宿配十二州分野最爲踈誕僅以畢昴
二星管異域諸國尤爲無據

經星分野無四夷九州之外復有九州乎
有則地廣而天狹

膚語

董仲舒對鮑敞曰二氣之初蒸也若有若
無若實若虛若方若圓攢聚相合而風
雨雲霧雷電雪雹生焉氣上薄爲雨下
薄爲霧風其噫也雲其氣也雷其相擊
之聲也電其相擊之光也太平之世風
不鳴條開甲散萌而已雨不破塊潤葉

津莖而巳雷不驚人號令啓發而巳電
不眩目宣示光耀而巳霧不塞望浸淫
被泊而巳雪不封條凌殄毒害而巳雲
則五色而爲慶三色而成禱露則味結
而成其潤結而成膏此聖人在上陰陽
和風雨時也政多紕繆則陰陽不調風
發屋雨溢河雪至牛日雹殺驢馬此皆
陰陽相蕩而爲稜沴之妖也

西京雜記

東方之氣雷南方之氣電西方之氣虹霓
北方之氣雲雨雹霰中央之氣露

造化

權輿

雲至陰也乘陽而行烈陽蒸之滛而爲雨
陽至烈也爲陰所困迸而爲電破而爲
雷陽勝則陰化而雨急陽不勝則陰滯
而雨微是故雷隨電雨隨雷

膚語

雪寒在上故高山多雪霜寒在下故平地

多霜日在地上時多故地熱而井寒日
在地上時少故地寒而井溫

草木子

盛陰雨雪凝滯陽氣薄之不相入則爲霰

盛陽雨水溫暖陰氣脅之不相入則爲

雹霰陽脅陰也雹陰脅陽也

洪範五行傳

風含太玄之中精故能動化百物而行乎

天上水含太乙之中精故能潤澤萬物

而行乎地中

子華子

孫寶爲京兆尹秋日署候吏爲東部督郵

勅曰今鷹隼始擊當從王氣取姦惡以

成嚴霜之誅

漢志

長壽二年元日大雪其夜質明而晴上謂

侍臣曰俗云元日有雪百穀豐此語有

何故實文昌右丞姚璿對曰汜勝書云

雪是五穀之精以其汁和種則百穀大

穰宋武帝大明五年元日降雪以爲嘉

瑞上曰朕臨御萬方心存百姓如得年
登歲稔此即可爲大瑞雖獲麟鳳何用

馬

唐書

王者政令苛則夏下霜誅伐不行則冬霜

不殺草

春秋感精符

鴻乙通卷七十八終

鴻乙通卷七十九

天地三

天有九部八紀地有九州八柱東南神州
曰晨土正南邛州曰深土西南戎州曰
滔土正西弁州曰开土正中冀州曰白
土西南杜州曰肥土北方玄州曰成土
南北咸州曰隱土正東揚州曰信土崑
崙山爲柱氣上通天崑崙者地之中也

地下有八柱柱廣十萬里有三百六十
自天地剖判以來禪海環之中國外如神
州赤縣者九乃有大瀛海環其外北景
在齊州之南故開北戶以向日天竺在
中國之西故啓東牖以迎陽温清地當
巽維日初極熱而午乃温骨刺幹僻在
北際羊脾適熱日已復出五臺六月山
飛陰雪故曰冰天象臺歲際闢戶納涼
故曰炎海泰山有日觀雞鳴而日已昇
挹婁處壑谷接九梯而氣深燠此地之
高深然也天地冲和之氣萃於中土有
衣冠禮樂之風殊方水土之精溢于尤
物饒沉沙棲陸之珍彼窮荒遠陬如日
本如流沙如懸度地多熱如雪山如漏
天如盧龍地多寒皆日月所偏照梯航

所罕通浸不與中國類維陽東抵扶桑
踰二萬里次則日本一萬五千里其地
溫燠西抵安息二萬五千里南至大秦
八千里其地晝熱南抵真臘二萬里次
則扶南一萬三千里其地炎暑北抵流
鬼一萬五千里次則駁馬一萬四千里
其地常雪此地之限極然也

王柏

禹東至搏木之地日出九津青羌之野攢
樹之所搭天之山鳥谷青丘之鄉黑齒
之國南至交趾孫撲續捕之國丹粟漆
樹沸水漂漂九陽之山羽人裸民之處
不死之鄉西至三危之國巫山之下飲
露吸氣之民積金之山共肱一臂三面
之鄉北至人正之國夏海之窮衡山之
上犬戍之國夸父之野禺疆之所積水
積石之山不有懈惰憂其黔首顏色黎

黑步不相過以求賢人欲盡地利至勞
也得陶化益真窺橫革之交五人佐禹
故功績盟乎金石著于盤盂

呂氏春秋

嘗言之溟渤漲洋天地之所以限東徼也
惡溪沸海天地之所以限南徼也陷河
懸度之設乎西瀚海沙子之設乎北天
地之所以遮西而制北者也激障霧於
東維界黑水於南極泄流沙於西隴決
弱水於北滅天地之所以界四維也八
荒之內奚有奚無八荒之外何窮何止
古之聖人一視同仁爲吾臣與爲狄人
臣奚以異是故人得其君則已矣
四海之邊中國者山東爲東海廣南爲南
海耳目睹記不待證說若夫禹跡所及
西境流沙而極不言西海東北嘗至碣
石北海之名不著於經則謂外薄四海

訖於四海者何說也漢武帝事遠使命
四表西北二海遂有身歷而目擊者條
支之西有海先漢使命嘗見之後漢班
超嘗遣其華至其地西海之西有大秦
者夷人與海商皆嘗往來霍去病之封
狼居胥也其山實臨瀚海者北海也蘇
武郭吉皆爲匈奴所幽冥北海上唐史
突厥部北海之北更有骨利幹之國在
海北岸然則詩書所稱四海實皆環夷
夏而四之若夫西北柏海青海蒲類海
蒲菖海居延海白亭海鮮水海皆並海
立稱要其實衆水鍾爲大澤如洞庭彭
蠡之類借海以名之非真海也李吉甫
辨白亭海曰河北得水便名河塞外有
水便名海是也班固叙張掖之水曰羌
水東北至居延入海則真以居延爲海

矣程大昌北邊備對

洪景廬曰海一而已北至青滄則云北海南至交廣則云南海東漸吳越則云東海無所謂西海者漢西域傳所云蒲類海疑亦淳居一津爾班超遣其英往條支臨大海蓋亦南海之西云據此則程泰之所論西海景廬尚未以為是也宇宙之大安有涯涘西海且不可見安所謂大瀛海者而望其洋也

習海者云航海自二浙可至平州聞登州竹山駝基諸島之外天晴無雲可遠望平州城壁今自二浙至登州與密州皆由北洋水極險惡然有自膠水鎮三日而抵明州定海者杜甫後出塞云漢陽豪俠地擊鼓吹笙竽雲帆轉遼海粳稻來東吳越羅與楚練照耀輿臺軀昔遊

卷七十九
六
篇云幽燕盛用武供給亦勞哉吳門轉
粟帛泛海凌蓬萊其事可見

西溪叢語

嘉靖初河道王獻燒斷馬家濠山海道遂
通惜功未及就而遽廢今自膠州下海
南至海門崑山一帶自昌邑新河下海
北至直沽天津一帶商舟通行無險中
間自膠北至昌邑陸地未通者百餘里
然秋後霖潦猶可通桴無復高山厚坂
爲之限隔稽之往牒平度東南北新河
水源出高密至膠州分爲南北元人嘗
治閘新河店通海潮徑達安東以避關
洋之險今可訪而得此道通計自海門
抵天津不過千里達之不過十餘日且
無放洋之險牽挽之勞挑剝之費視之
漕河所得不知幾什百倍議者乃以開
鑿之難財力之困爲慮爲國家建大計

苟利足償費尤爲之况萬倍於此乎今膠萊費河長不過百里可執畚鍤以從可計時日而就縱大費亦一里千金止耳若海道一通以江西江東湖廣之粟照舊河運以東西瀕海一帶悉由海運表裏相資以甦漕卒之苦誠經國至計

泉河志

崑崙天下之頂也乃天下山之至高處山之起勢處其東面中原也所以江淮河濟水皆東流也其西面西域諸國也自流沙以西水皆西流南自吐蕃兩廣水皆南趨也北即沙漠又岡脊至高之處直北虎林至海都木鉢子田地地勢又逐漸而低皆北流南視陰山反爲極南之境矣大抵地形如亭子中高而四方下崑崙乃結頂處四下之簷乃四方之

國土考其流水可見必皆會同於四海
篩文清觀厓石每層有紋橫界而層層相
沓謂爲天地之初陰陽磨盪而成若水
之漾沙一層復一層也蓋天地之初混
沌一物惟有水火二者開闢之際火日
升水日降而天地分矣凡山阜皆從水
中洗出觀江河沙洲可見嘗謂水天下
之至高者也山天下之至卑者也故海
底有石山顛有水然水實至高霜露雨
雪是也

玉堂漫筆

山海經述海外山詳矣不言須彌或曰卽
崑崙也然其述日月出沒不言崑崙而
曰東海之外大荒之中有山曰倚天蘇
門日月所生有山曰壑明俊疾日月所
出西海之外有方山上有青樹曰柜格

卷七十九
九
之松日月所出入也大荒之中有山曰
豐沮玉門日月所入有山曰塵鏊鉅日
月所入有山曰常陽日月所入有山曰
大荒日月所入豈所謂方山者即佛氏
之須彌耶柎格之松即佛氏之閻浮提
樹耶至于蘇門玉門等山爲日月出入
又不可盡解

世以二十八宿配十二州分野僅以畢昴
二星管異域諸國殊不知十二州之內
東西南北不過綿亘三萬里外國動是
數萬里不知幾中國之太中國僅可配
斗女二星而已鄭樵仲云天之所覆者
廣華夏之所占者牛女下十二國牛女
在東南故釋氏以爲南瞻部洲二十八
宿所管者多十二國之分野隨其所隸
耳

癸辛雜誌

東至秦遠西至邠國南至濮鉛北至祝栗
謂之四極九夷八狄七戎六蠻謂之四

海爾雅

崑崙東南方五千里謂之神州中有和羹
鄉方三千里五嶽之城帝王之宅聖人
所生也

貞觀中李淳風撰法象志北戒自積石負
終南地絡之陰東及太華踰河並雷首

底柱王屋太行北抵常山之右乃東循
塞垣至濊貊朝鮮是為北紀所以限戎
狄也南戒自岷山嶓冢負地絡之陽東
及太華連商山熊耳外方桐柏自上維
南逾江漢携武當荆山至於衡陽乃東
循嶺徼達東甌閩中是謂南紀所以限
蠻夷也故星傳謂北戒為胡門南戒為

越門唐志

人間三十六洞天知名者十耳餘出九微
志不行于世就十洞天中人之足跡能
及幾許有濟勝之志者或解矣

說儲

五嶽能大布雲雨雲觸石而出膚寸而合不
崇朝而雨天下施德博太故視三公也

說苑

天地四方皆海水相通地在其中蓋無幾
也海曰百谷王神曰海若海一名曰朝

夕池一曰天池一曰大壑巨壑

博物志

水不溢歸墟尾閭之爲耶數畝之陂而以
灌畦之溝十數注之積歲不見加多也
大海止數畝之陂乎而水之入者鴨綠
直沽淮陽海門浙江等十數處爾自大
海視之何異灌畦之溝耶此而加溢何
以爲海况風日所消懼其入之不給也
而何以尾閭爲

膚語

河源出吐蕃朶其思之西鄙有泉百餘泓
水沮洳渙散方可七八十里淖約不勝
物從高視之燦若列星是謂星宿海云
夷言火敦惱兒火敦星惱兒海也羣流
奔湊近五七里滙二巨澤夷言阿刺惱
兒也自西來連屬吞噬迤邐而東行一
日程始成川名赤賓河又二三日程有
水西南來名赤黑出與赤賓合又三四
日程有水南來名忽蘭又有水東南來
名也里水合流會於赤賓其流寢大始
曰黃河云然水清人尚可涉又一二日
程乃爲九度河九度者水八九股可度
也廣六七里又四五日程水始連濁土
人抱革囊或乘馬過之亦有象舟傳革
以濟僅容二人繼是束以兩山廣可一
二里或半里深不測矣

陸儼山

朶耳思之東北鄙有大雪山自腹至頂積雪常不消山最高卽所謂崑崙也自八九股水至崑崙約計二十日程河行崑崙南半日程又四五日程至濶即及濶提二地相屬又三日程始至四達之衢是謂哈刺別里赤兒崑崙之西人跡簡少多處山南其東山益高地益下岸亦益狹有狐可一躍過也又行五六日程有水西南來名細黃河又兩日程有水南來名乞兒馬出二水合流入河河北行轉西至崑崙北二日程水過之北流少東又北流約行半月程至貴德州州隸河州元所置吐蕃宣慰司也又四五日程始至積石禹貢導河自積石其地也又五日至河州安鄉關又一日程至打羅坑又東北行一日程洮河水南來

入河又一日程至蘭州過北卜渡至鳴
河州過應吉里州正東行至寧夏南又
東行即東勝州也世言黃河九折彼地
有二折蓋乞兒馬出及貴德州必赤里
也

河道崑崙山名地首上爲權勢星東流千
里至規期山名地契上爲距樓星北流
千里至積石山名地肩上爲別符星卻
南千里入隴首山抵龍門首名地根上
爲營室星龍門上爲王良星爲天橋神
馬出河躍南流千里抵龍首至卷重山
名地咽上爲卷舌星東流貫砥柱觸闕
流山名地喉上爲樞星以運七政西距
卷重山千里東至維會名地神上爲紀
星東流至大岷山名地肱上爲輔星東
流過絳水千里至大陸名地腹上爲虛

星河圖

西域記阿耨達大山即崑崙山柯九思謂
崑崙行一月始窮河源所謂星宿海者
更在崑崙之西數千里外河源於星宿
海匯爲二澤流合三山岐爲九渡行二
千餘里經崑崙山由山南又合二水北
流折而西復過崑崙之北又轉而東又
北行二千餘里至于積石自星宿海至
積石總計六千七百餘里自九渡河抵
崑崙可三千里漢張騫唐薛元鼎皆得
之傳聞惟元薄海內外皆置驛通道絕
域都實所詣皆鄉道指授潘昂霄所志
皆有證據然後知于寘鹽澤崑崙皆河
流所經去源猶遠

濶灤海子有山如長堤以限水海子甚濶
望之杳無泮岸望水高如山白浪隱隱

自高而下天下之物莫平於水獨此水
遠見如山之高近處若極下每歸語人
少有信者水周圍千里幹難臚响凡七
河注其中名曰玄冥池

北征錄

西域有沙海正據要津其水熱如湯不可
向近天之所以限華夷也終古未嘗通
中國忽一夕有巨獸浮水室其骨長數
十里橫於兩汊如津梁然中有髓竅可
容並馬於是始通中國國課往來者每
以膏油塗其骨懼其朽折則無復可通

耳癸辛雜誌

海潮之說葛洪潮說曰天河激湧洞真正
一經曰地機翁張盧肇海潮賦曰日出
海而衝擊施師論曰山爲湧而濤隨是
皆穿鑿不根與山海經海鮪出入浮屠
書神龍變化者等耳至竇叔蒙海嶠志

謂水隨月之盈虛。余安道海圖序謂月周天而潮應。高麗圖經謂元氣與地浮沉。其濱論謂水往從月之理。捕風捉影。難免管窺。獨揮塵錄所載燕肅海潮論。輟耕錄所載宣昭潮候說。見同而義亦明。似得其旨。因思天地有水猶人有血。水由氣往來於地。猶血以氣往來於脈。水有潮有不潮。猶血有行脈不行脈者。時刻不爽。卽一息四至之期也。大小不同。卽春弦夏洪之道也。日止一潮。或半月東流。半月西者。猶兩躡之與兩手遲速。大小不同也。脈皆由于一身經絡。自異。至於潮必東起。東乃生氣之方。陰陽氣始於此也。百川之本。盡赴于東。返本之義。馬猶人身血氣歸源。中焦亦起於寅。生氣之際也。

望夕之月月受陽光光正滿故望夕陽潮
至子而滿子爲陽之生氣也晦夕之月
月還陰魄魄正滿故晦夕陰潮至午而
滿午爲陰之生氣也

耄餘雜識

按潮稱潮信言往來不爽也昔人言從月
又有從長短星者至聖方龍泉又何當
於月星瓊海之潮不以晝夜望以前東
流望以後西流何說也同一天地同一

喘息潮候大異如此王克余安道諸儒
見止一隅豈可執之謂足以盡潮汐之
故哉蓋堯舜禹三聖人二典禹貢不載
潮汐雖聖人不得強爲之說

顧元慶

四瀆何以視諸侯能蕩滌垢濁焉能通百
川於海焉能出雲雨千里焉爲施甚大
故視諸侯也

說苑

江河淮海天之奧府衆利所聚可以饒有

河以通乾出天包雜以流坤出地符河龍

圖發雜龜書感王者沉禮焉

春秋元命包

江出岷山河出崑崙濟出王屋穎出少室

漢出嶓冢分流外馳注于東海

文子

江之有三峽猶河之有龍門與江之有金

焦猶河之有砥柱與水石之性易地皆

然庸語

麟德二年發東都至濮陽問許敬宗曰濟

水與濟源斷絕不相屬何故對曰禹貢

道沅水東流為濟入於河自此潛流地

下過河而南侵出為滎澤又潛流至曹

濮散出平地漸合而東流為汶水自南

注之古者五行皆有官守不失其職故

辨其味與色潛流復出合而更分皆能

識之尚書所載與今同矣

唐會要

濟水伏流暗經東阿今阿井水煎之爲膠
可以已疾實濟水液也

野記

麟德二年十月發東都至濮陽問許敬宗
曰濟水細微而稱瀆何也對曰爾雅云
瀆者獨也言不因餘水能獨赴海故也
且天有五星運爲四時地有五嶽流爲
四瀆人有五事用爲四支五陽數四陰
數也陽者光耀陰者晦昧故星辰潛伏
而難見濟水潛絕而數絕收雖細微其

實尊也上稱善

唐會要

何謂九藪越之具區楚之雲夢秦之陽華
晉之大陸梁之圃田宋之孟諸齊之海
隅趙之鉅鹿燕之大昭

呂覽

開成未未興坊民王乙掘井過常井一丈
餘無水忽聽向下有人語及雞聲甚喧
鬧井匠怪懼不敢掘街司申金吾常處

仁以事涉怪異不復奏遽令塞之然抑
知厚地之下別有天地也

酉陽雜俎

盤道屈曲而上凡五十餘盤經小天門大
天門仰視天門如從穴中視天窻自下
至古封禪處四十里山頂西巖爲仙人
石間東巖爲介丘東南巖名日觀日觀
者雞一鳴時見日始出又東南名秦觀
秦觀者望見長安吳觀者望見會稽周
觀者望見齊黃河去泰山二百餘里瞻
之如帶若在山陴

泰山記

司馬子長上會稽探禹穴自言徧游萬里
之目上會稽總吳越也探禹穴言巴蜀
也後人不知其解遂以爲禹穴在會稽
作地志者以禹廟傍小坎如春臼者當
之是有何奇而辱子長之筆按蜀之石
泉禹生之地其石沓深人跡不到頃脩

蜀志搜石碑刻禹穴二字乃李白所書
始知會稽禹穴之誤大抵古人作文言
簡而括禹貢曰雲土夢作又雲在江南
夢在江北一言而括千餘里又曰蔡蒙
旅平蔡山在雅州蒙山在滇中今有蒙
樂山上有碑具列其事亦四字括千餘
里古人立言說性命義理恐其不明不
厭重複易曰明辨折也詩曰昭明有融
高朗令終之類言山川物產則一言盡
之嫪鐵絲泉橘柚及微盧彭濮庸蜀羌
髡之類更不復書此易知耳

丹鉛

宛委山有石匱壁立中有穴號陽明洞即
舊經所謂三十六洞天之一洞也禹
發之得赤珪如日碧珪如月又得金簡
玉字之書悟百川之理賀知章纂山記
曰黃帝號宛委山爲赤帝陽明之府於

此藏書禹始於此得書復此於藏書因謂
之禹穴勾踐自夫椒之敗棲於會稽之
石室服犢鼻着樵頭斫莖養馬卽此處
司馬遷自叙上會稽探禹穴舊經諸書
皆以禹穴係會稽之宛委今里人以陽
明洞外飛來石下爲禹穴用脩所謂禹
廟傍小坎如春臼者乃飛來石下里人
所傳者耳宛委所謂十一洞天陽明洞
者自在也石紐禹穴自有之子長所探
還是會稽禹穴

益陽縣在長沙郡界北臨資水源出邵陵
東北流入洞庭東望時見長沙城隍人
馬形色悉可審辨或平旦或平午覽矚
移晷仍漸散滅縣去長沙徑道三百里
跨越重山理絕表顯將是山嶽炳靈冥
像所傳者乎昔漢中元元年封泰山禪

梁父是日山靈秉是宮室秦皇遣方士
徐福浮海採藥於波中見漢家階基樓
觀參羌宛然倘矚公侯宅第蒲日班超
在渾耶國平旦雲霞鮮朗見天際宮館
巖列侍臣左右悉漢家也如斯之類難
可審論


錄異記

庭州灞水在大荒之外以金鐵盛之皆漏
唯角與瓠葉則否拘夷山中有流水亦
如之延安石油以爲烟墨松脂不及唐
詩二郎山下雪紛紛石烟多於浴陽塵
南荒有黑溪水其水以塗古象至輒不
去昆侖兒以塗身卽能乘象古所謂黑
昆侖今之象奴也

歷城二里北有蓮子湖周環二十里湖中
多蓮花紅綠間明乍疑濯錦又漁船掩
映晷晷踈布遠望者若蛛網浮杯也

鴻乙通卷七十九終

卷七十九



卷之四